

Nos Antepasadonan... dr. Horacio E. Oduber

Nos hospital ta carga e nomber aki, pero boso sa kende tabata Dr. Horacio Eulogio Oduber?

CHABALITO lo bai trece un serie interesante tocante nos antepasadonan y den prome edicion nos lo bai conta boso algo mas di e prome dokter Arubiano aki.

Horacio Eulogio Oduber a nace dia 28 di januari di 1863 na Puerto Cumarebo. Su famia tabata conta cu tres dokter mas. Su dos jiu hombernan, Dr. Fransisco Oduber (dokter Pancho) y Dr. Jacobo Oduber (dokter Cobito), y su ruman Dr. Daniel Oduber, kende a traha na Panama.

Na aña 1880, tempo cu e tabata tin 18 aña, el a bai studia na Baltimore, na Merca. El a obtene su titulo di medicina na Universidad di Maryland. Dokter Horacio, dokter Acho manera nan tabata yam'é, tabata biba na unda awe tin e edificio grandi di Centrale Bank, pa'bou di kerki protestant den Wilhelminastraat na Playa. Den e tempo ey no tabata tin ni un hospital. Asina ta e tabata tuma tur consulta na su cas. Tambe Dr. Horacio tabata usa su propio cas pa aloha patientnan grave. Partonan tambe

tabata tuma lugar eyan y semper e tabata wordo asisti pa un señora, Ma Martha Angela, kende tabata biba cu su jiu na patras di cas di Dr. Horacio. E tempo ey nan no tabata conoce anestesia (algo pa manda hende leu, pa kita dolor). Den caso cu un patient mester wordo opera, e tabata dun'é rom of jenever pa asina e por a traha cun'é.

Ora cu tabata di bai mira un patient na cas, e tabata bai cu su kitin - un garoshi lastrá pa cabay.

Tabata tin biaha tambe cu su patientnan no tabata tin placa pa paga

e dokter su bon trabaonan. Como recompensa pa su yudansa, nan tabata pag'é cu boonchi y otro producto di nan cosecha, of nan tabata warda simplemente yerba pa e cabay. Mas despues, tempo cu Aruba a conoce auto, Dr.

Horacio tabata un di e promenan cu tabata doño di un auto, loke e tabata tin mester pa bishita su patientnan. Na aña 1935 Dr. Horacio a fayecé na Curaçao.

Dr. Acho tabata un persona masha respetá y aprecia den e comunidad chikito di e tempo ey. Pesey e merece e honor grandi cu Aruba a dun'é na aña 1976: E hospital grandi cu nos isla tin a haya nomber di e prome dokter Arubiano: Dr. Horacio Eulogio Oduber.




Esaki ta un 'prentkaart' cu ta aparece den e buki 'Aruba in oude ansichten' di Dr. J. Hartog. Por aprecia e cas di Dr. Horacio den Wilhelminastraat y patras por mira e kerki protestant bieu tambe.

Bo yiu merece e miho.....

Cada **little Tikes** cu nos vende, na **Mareve**, nos ta duna bo **100% di garantia**. Si algo kibra of dañá nos lo remplase completamente **GRATIS***




Toys



Fergusonstraat 42-A
Tel. 825393

* mester ta cumpra na Mareve Toys & Gifts

Chabalito



Number 1 - Año IV -
September, 2001 - Afl. 2,=

